

## tanam 50,000 pokok

**PETALING JAYA:** Yayasan Petronas komited untuk menanam 50,000 pokok sebagai sebahagian inisiatif pemuliharaan alam sekitar Sentuhan Alam menjelang Jun ini.

Setakat ini, sebanyak 11,900 pokok telah ditanam menerusi cabaran *Walk4Trees* di mana satu pokok akan ditanam untuk setiap sejuta langkah yang dihabiskan oleh pekerja Petronas.

Ketua Pegawai Eksekutifnya, Nelly Francis Shariah memaklumkan, program itu mencerminkan komitmen Petronas untuk menyumbang kepada masyarakat, sesuai dengan Agenda Kelestarian organisasi untuk melindungi alam sekitar.

"Dengan hampir 20 bilion langkah, pekerja kami telah berjaya menyumbang 20,000 pokok dari jumlah keseluruhan dan kita yakin pekerja dapat mencapai sasaran 50,000 pokok pada Jun ini.

"Selain melestarikan alam sekitar, projek ini juga sebagai satu platform kepada pekerja Petronas untuk memberikan kesan positif kepada kesihatan mereka dan secara tidak langsung membantu dari segi memperbaiki iklim negara," katanya dalam kenyataan semalam.

Jelas Nelly, Petronas telah lama mengambil bahagian dalam menyumbang untuk memperbaiki alam sekitar seperti pemuliharaan hutan hujan di Imbak Canyon, Sabah; pemulihan biodiversiti laut dalam projek Biodiversiti, Alam Sekitar & Pemuliharaan (BEACON), Sarawak; pemulihan bakau dan penubuhan Pusat EcoCare di Kerteh, Terengganu.

Pihaknya juga bekerjasama dengan program Pemuliharaan dan Pelancongan Ekosistem Setiu Wetland, Terengganu, untuk meningkatkan fasiliti mereka.